



SA GEMEENTE
SA CONGREGATION



Kerkfamilie in 2019

deur Andre Harmzen

Aan die begin van 'n nuwe jaar staan ons almal weer voor die spieël en dink – Wat gaan 2019 'n beter jaar maak? Oor die volgende 12 maande gaan ons Gemeente saam werk daaraan om inlyn met ons roeping, 'n gesonder geloofs familie en tuiste te wees.

Paulus en Petrus beskryf die Kerk as 'n spirituele gebou, wat bestaan uit lewende stene, met Christus as die hoeksteen waarop alles rus en aan verbind word. Hierdie beeld maak dit duidelik hoe ons as Christene op mekaar moet steun en ons as gemeente op Christus.

Christenskap is 'n span sport. Elke gemeente word geroep om saam te oefen, te werk en te bid, en om aan die hand van God se Woord te groei as lede van Sy liggaam. Dit beteken om fisies en geestelik deel te neem, met passie te bedien, met liefde te bemoedig en te versterk. Dit beteken bowenal dat ons in vertroue op die Heilige Gees sal leef om sterker, gesonder en fikser in ons geloof te wees.

Die Kerk is 'n lewende organisme, eerder as 'n organisasie, 'n lewende gemeenskap eerder as 'n gebou, 'n naby familie eerder as 'n kolleksie van individue. Dit is my gebed dat jy 'n aktiewe Christen leefwyse sal vestig en wanneer jy aan die einde van 2019 voor die spieël staan jy 1 Korintiërs 13:12 sal verstaan: Nou kyk ons nog in 'n dowwe spieël en sien 'n raaiselagtige beeld, maar eendag sal ons alles sien soos dit werklik is. Nou ken ek net gedeeltelik, maar eendag sal ek ten volle ken soos God my ten volle ken.

**U kroon die jaar met u goeie gawes. Waar U ook gaan, is daar
oorvloed!
Psalm 65:11**



SA GEMEENTE
SA CONGREGATION

Nume Jaar...Nume Genade

Here, Almagtige, Oneindige Skepper, Voleinder,
'n jaar is vir U net 'n oogwink,
maar vir ons is dit 365 dae lank, 'n lang pad.
Here, vir ons is elke jaar volgepak met goed en kwaad.
U is die Here van elke uur en dag en jaar.
Maar ons is gevange slawe
van die vervlietende tyd.
Here, en tog bring elke jaar ons nader aan U.
Mense word jaar vir jaar ouer,
maar U kinders word jonger.
'n Jaar lê agter ons,
vir altyd verby.
Plek-plek loop die pad pylreguit deur die vlakke,
ander kere met kronkelpaaie oor die steiltes,
vol slaggate, pap wiele,
verpaste treine, verspeelde geleenthede.
Here, oor die geleenthede
wat onbenut verbygegaan het,
sou ek wanhopig kon raak,
as dit nie was dat U vergewe nie.

*Here, elke dag is u genade nuut,
sedert Noag se reënboog,
en is u goedheid nuut,
sedert Jesus Christus....*

Here, as U die hare van my kop getel het,
het U sekerlik ook my dae getel,
die minute en sekondes daarvan
-alles hou U in die palm van U hand.
Here, ek dank U vir gesondheid
in die jaar wat verby is.
Ek bid vir gesondheid in die een wat voorlê,
vir genoeg kos vir elke dag,
Maar veral bid ek om 'n honger na u Woord,
na U self....

Dit sal weer 'n jaar wees vol genade.
Amen
'n Gebed uit Ghana



SA GEMEENTE
SA CONGREGATION

IN HIERDIE UITGAWE

Manne Ontbyt

MANNE ONTBYT

DAMES 'CREAM TEA'

KERSDIENS 2018

MARLIZE BASSON

KONTAK ONS

Die Desember ontbyt vir die manne van Birmingham is nou al tradisie. Die manne kom vroeg oggend by Frankie en Benny in Coventry bymekaar. Hulle gesels, herlaai batterye en beplan vir die volgende jaar. Kom word deel van die manne bediening vir 2019. Hou ook die afkondigings dop vir 2019 se byeenkomste. Daar is ook 'n WhatsApp groep waarop kommunikasie deurgegee word ivm manne byeenkomste. As jy nog nie deel is hiervan nie laat weet asb vir Frikkie. (Hierdie is nie 'n klets groep nie en net die nodige kommunikasie vind op die groep plaas.)





SA GEMEENTE
SA CONGREGATION

Dames 'Cream Tea' by Farm Oakes.

1 Desember.

Die laaste maand van 2018 het aangebreek. Die Dames ontmoet by Oakes Farm in Balsall Common vir 'Cream Tea' en kuier. Dis 'n nat mistroostige oggend, maar die warm atmosfeer binne die restaurant maak ons harte warm. Ons het 'n lieflike uitsig oor die groen velde met skape wat tot teen die groot venster wei. Rustige 'country side' soos mens dit net in Engeland kan ervaar.

Die restaurant en 'plaaswinkel' is besig, maar terselfdertyd gesellig. Die warm botterbroodjies met konfyt en room is heerlik. So ook die ontbyt vir die Dames wat ver gery het.

9 Dames en klein Zelda het 'n gesellige oggend saam gehad. Ons sien uit daarna om volgende jaar meer gereeld saam koffie te drink en te kuier.





SA GEMEENTE
SA CONGREGATION

Kersdiens 2018

2 Desember

Vroeg oggend is daar 'n geskarrel in die saal. Manne slaan tafels op en skuif stoele rond. Dames dek en versier die tafels, terwyl Flame BBQ die potjies buite aan die gang kry. Tussen deur speel die kinders, manne skink tee en daar is tyd om bietjie te gesels. Alles voel soos Kersfees.

Die diens begin met Dana de Waal wat Jubilate sing, begelei deur Anne de Waal. Kersmusiek onderleiding van Hanlie, Eric en Dominic vul die saal. Die program word afgewissel met sang solo's, gemeente sang en voorlesings deur gemeenteliede. Die program sluit af met 'n onvergeetlike vertolking van Mary's Boy Child deur Dana onder begeleiding van Anne. Voorwaar 'n baie Geseënde Aanbiddingstyl.

Na die diens neem Chaan van elke tafel foto's. 'n Lekker ligte atmosfeer heers. 12 uur begin Matthew en sy span die kos skep. Alles lyk keurig, en die heerlikste reuk vul die lug. Slaai, pap, rys, 'n hoender potjie en tamatie lamsnek potjie is op die spyskaart. Vir nagereg is daar heerlike malvapoeding met vla. Die kos is voorwaar uit die boonste rakke.





SA GEMEENTE
SA CONGREGATION

Kersdiens 2018 gaste.





SA GEMEENTE
SA CONGREGATION

Kersdiens 2018 gaste.





SA GEMEENTE
SA CONGREGATION

KALENDER

GASSPREKER. SOP EN BROODJIE KUIER
20 JANUARIE OM 10 UUR.

EREDIENS
3 FEBRUARIE OM 10 UUR.



Dr Marlize Basson **20 Januarie 2019**

Tema: Gelukkige en gesonde gesinne in 2019.

Sondag 20 Januarie gaan Dr Marlize Basson met ons kom gesels oor gelukkige gesonde gesinne in 2019.

Wie is Dr Marlize Basson?

Marlize is 'n opvoedkundige sielkundige met 'n intense passie vir die groei van kinders, sowel as om ouers te begelei in hulle kinders se leer- gedrags- en emosionele ontwikkeling. Na voltooiing van haar Phd het sy oorbeweeg na neuropsigologie. In 2012 kwalifiseer sy ook as 'n "nutritional therapist".

Na die diens gaan ons saam kuier en heerlike sop en broodjies eet.



SA GEMEENTE
SA CONGREGATION

Kontak Andre Harmzen



SA Gemeente Loughton Kerkkantoor
16 Baldocks Road
Theydon Bois
CM16 7EB

Epos: andre@sagemeente.com

Erediens Tye

Ons Eredienste is elke 1ste
en 3de Sondag van die
maand om 10:00.

Adres

Alderbrook School, Blossomfield
Road, Solihull, B91 1SN
(Google Maps)

Kontak Helena



Helena Claassen

Epos: helena@sagemeente.com